

दिनांक 22.02.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- श्री मदन राठौड़ ओजू भारतीय जनता पार्टी रा प्रदेश अध्यक्ष बण्णा— चुनाव प्रभारी विजय रुपाणी जयपुर मांय वां रा नाम रो ऐलाण कीनो।
- केन्द्रीय कृषि मंत्री शिवराज सिंह चौहान कह्यो—विकसित भारत रो संकल्प विकसित खेती बगैर पूरो नी कर्यो जा सके है।
- प्रधानमंत्री नरेन्द्र मोदी काल संवारे 11 बज्यां आकाशवाणी अर दूरदर्शन ऊं प्रसारित कर्या जावण वाळा खास कार्यक्रम **“मन की बात”** मांय विचार बतावेला।
- राजस्थान सहकारी बोर्ड री ओर ऊं 449 ओहदां माथे भर्ती सारु आवता दो महीनां मांय ऑनलाइन तरीका ऊं परीक्षा ली जावेला।

000

श्री मदन राठौड़ ओजू भारतीय जनता पार्टी रा प्रदेश अध्यक्ष बण गया है। चुनाव प्रभारी विजय रुपाणी आज जयपुर रा भाजपा मुख्यालय मांय ई बाबत् ऐलाण कीनो। वे राष्ट्रीय परिषद रा 25 सदस्यां रा नामां रो ई ऐलाण कीनो। आं मांय पैली वाळी मुख्यमंत्री वसुंधरा राजे, पैली वाळा मंत्री राजेन्द्र राठौड़ अर पार्टी रा पैली वाळा प्रदेश अध्यक्ष सतीश पूनिया समेत केई नाम शामिल है। असदस्य पार्टी रा राष्ट्रीय अध्यक्ष रा चुनाव री प्रक्रिया मांय शामिल व्हेला। राज्यसभा सदस्य मदन राठौड़ ने सात महीना मांय दूजी दफा प्रदेश भाजपा रा अध्यक्ष बणायी ज्या है। मुख्यमंत्री भजनलाल शर्मा, केन्द्रीय मंत्री गजेन्द्र सिंह शेखावत, पार्टी रा प्रदेश प्रभारी राधामोहन दास अग्रवाल अर पैली वाळी मुख्यमंत्री वसुंधरा राजे समेत केई आला नेतावां री मौजूदगी मांय वां रा नाम रो ऐलाण करी ज्यो। ई मौके श्री रुपाणी कह्यो के श्री राठौड़ री अगुवाई मांय पार्टी रा संगठन ने नुवी दिशा मिलेला।

ई मौके मदन राठौड़ कह्यो के वे पूरा मन ऊं पार्टी री विचारधारा अर संगठन ने मजबूत करण रो काम करेला।

000

विधानसभा मांय कांग्रेस रा प्रदेश अध्यक्ष समेत छह विधायकां ने निलम्बित करण रे खिलाफ आज जयपुर मांय कांग्रेस री ओर ऊं प्रदर्शन करी ज्यो। कांग्रेस रा कार्यकर्ता नारा लगा र विधायकां रो निलम्बन खत्म करण री मांग कीनी। ध्यानजोग है के स्पीकर वासुदेव देवनानी काल सदन री कार्यवाही रे दौरान कांग्रेस रा विधायकां रे वैल कने आवण अर लगातार हंगामो करण रा आरोप मांय छह विधायकां ने बजट सत्र रा बाकी दिनां सारु निलम्बित कर दीना हा।

000

केन्द्रीय कृषि अर किसान कल्याण मंत्री शिवराज सिंह चौहान कह्यो है के खेती-बाड़ी देश री माली व्यवस्था री बुनियाद है। वे आज नई दिल्ली मांय पूसा कृषि विज्ञान मेळा रा उद्घाटन जळसा मांय बोल रह्या हा। चौहान कह्यो के विकसित भारत रो संकल्प विकसित खेती बगैर पूरो नीं कर्यो जा सके है। वे कह्यो के सरकार किसानां ने आगे बधावण सारू लगातार जतन कर रही है।

कृषि मेळा मांय भारतीय कृषि अनुसंधान संस्थान री ओर ऊं विकसित करी ज्या बीजां री नुवी किस्मां रो दरसाव ई कर्यो जा रह्यो है।

कृषि मंत्री बतायो के प्रधानमंत्री नरेन्द्र मोदी 24 फरवरी ने किसान सम्मान निधि री 19वीं किस्त जारी करेला। वे बतायो के इण ऊं देश रा 9 करोड़ 80 लाख ऊं बत्ता किसानां रा बैंक खातां मांय 22 हजार करोड़ रुपया ऊं बत्ती रकम भेजी जावेला।

000

दौसा ज़िला री शालावास जेल मांय चलायी ज्या सर्च ऑपरेशन रा तैत मोबाइल फोन जब्त करी ज्यो। इण ई फोन ऊं जयपुर पुलिस कंट्रोल रूम मांय फोन कर र धमकी दीरीजी ही। गृह राज्यमंत्री जवाहर सिंह बेढम आज जयपुर मांय खबरनवीसां सागे बातचीत करता थकां कह्यो के ई मामला री जांच करी जा रही है अर दोषी लोगां ने नी बख्शा जावेला।

ज़िला कलेक्टर देवेन्द्र कुमार बतायो के जेल मांय मोबाइल मिलण परां पापड़दा पुलिस थाणा मांय मुकदमो दर्ज करायी ज्यो है।

000

अब खबरां महाकुंभ री –

महा शिवरात्रि रे मौके 26 फरवरी ने मोटी तादाद मांय जातरूआं रे आवण रा आसार ने ध्यान राखता थकां प्रयागराज मांय जरूरी तैयारियां तैय करी जा रही है। ई दौरान आपातकालीन हालात रो सामो करण सारू अस्पतालां मांय ट्रौमा केयर अर वेंटिलेटर रा सुबीता चौबीस ई घंटा मुहैया करावण री व्यवस्था करीजी है। ई रे अलावा नुवा साज-ओ-सामान सागे निगराणी तंत्र अर आपातकालीन डॉक्टरां री टीमां ई तैयार रेहवेला।

000

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम **“मन की बात”** मांय विचार बतावेला। हर महीना प्रसारित कर्या जावण वाळा ई कार्यक्रम मांय प्रधानमंत्री न्यारा-न्यारा मुद्दां माथे विचार बतावे है। ई दौरान वे खास उपलब्धियां हासिल करण वाळां लोगां अर समुदायां रो ई जिकर करे है। मन की बात कार्यक्रम री आ 119वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, एआईआर न्यूज वेबसाइट अर न्यूज ऑन एआईआर मोबाइल एप माथे प्रसारित कर्यो जावेला। ई सागे ई ए आई आर न्यूज, डीडी न्यूज, प्रधानमंत्री रा दफ्तर रा अर सूचना अर प्रसारण मंत्रालय रा यू-ट्यूब चैनलां माथे ई उपलब्ध व्हेला।

000

राजस्थान सहकारी बोर्ड न्यारा-न्यारा ओहदां माथे भर्ती सारू इम्तिहान री तारीखां रो ऐलाण कर दीनो है। अ परीक्षावां मार्च अर अप्रैल महीना मांय ऑनलाइन तरीका ऊं ली जावेला। सहकारिता विभाग री प्रमुख शासन सचिव मंजू राजपाल बतायो के आं परीक्षावां रे जरिये राजफैड, अपैक्स बैंक अर केन्द्रीय सहकारी बैंकां मांय 449 ओहदा माथे भर्तियां करी जावेला। वे बतायो के जूनियर असिस्टेंट, अकाउंट्स ऑफिसर, एनिमल न्यूट्रिशन ऑफिसर, प्रोग्रामर, असिस्टेंट मैनेजर अर ऑपरेटर रा ओहदां माथे भर्ती सारू 26 मार्च ने परीक्षा ली जावेला। जूनियर अकाउंटेंट, असिस्टेंट मैनेजर, इन्फोर्मेटिक असिस्टेंट अर फिटर ओहदां सारू 27 मार्च ने परीक्षा व्हेला। बैंकिंग असिस्टेंट ओहदा

सारु 1 अप्रैल ने, मैनेजर ओहदा सारु 5 अप्रैल ने अर सीनियर मैनेजर अर कम्प्यूटर प्रोग्रामर ओहदा सारु 13 अप्रैल ने परीक्षा ली जावेला।

000

राजस्थान पुलिस अकादमी मांय आज पदक वितरण समारोह राखी ज्यो। जळसा मांय आरपीए रा निदेशक अर एडीजी एस. सेंगाथिर पुलिस रा 15 कर्मचारियां ने सराहनीय सेवा सारु डी.जी.पी. डिस्क, 15 पुलिस वाळां ने अति उत्कृष्ट अर 9 पुलिस वाळां ने उत्कृष्ट सेवा चिह्न पदक दे र नवाजा। ई मौके सेंगाथिर कह्यो के नवाजी ज्यो सगळा पुलिस वाळा कर्तव्य परायणता अर प्रतिभा रो दरसाव कीनो है। वे सगळा पुलिस वाळां ऊं समाज मांय पीड़ित अर कमजोर तबका री जनता सारु काम करण बाबत कह्यो।

000

जोधपुर मांय आज आयुर्वेद विश्वविद्यालय कने बण रह्या पुल माथे ट्रक री फेंट आ जावण ऊं मोटरसाइकिल सवार एक ही परिवार रा दो जणां री मौत व्हे गयी अर दो जणां जखमी व्हे ग्या। उदयपुर जिला रा झाड़ोल री रण घाटी मांय एक बेकाबू बस पलट जावण ऊं दो जणां री मौत व्हे गयी अर 28 जणां जखमी व्हे ग्या।

000

टोंक जिला रा निवाई मांय मधुमक्खियां रा हमला ऊं बचण री कोशिश मांय गहरी खाई मांय पड़ जावण ऊं दो बच्चां री मौत व्हे गयी। सिविल डिफेंस री टीम अर वठे रा लोग आखी रात वां ने हेर्या। ई पाछे आं बच्चां री लाशां मिली।

000

प्रदेश रा बजट मांय हर साल दस करोड़ पौधा रोपण रा ऐलाण पाछे पाली जिला री पौध शालावां मांय भांत-भांत री प्रजातियां रा पौधा तैयार कर्या जा रह्या है। जिला वन अधिकारी पी.एल. बालामुरुगन बतायो के सेवाड़ी, गुंदोज, रोहट, सादड़ी अर सोजत री पौध शालावां मांय पौधा तैयार कर्या जा रह्या है।

000

झालावाड़ जिला रा बकानी हलका मांय घाटोली अर गुलखेड़ी गांवां मांय लगायी ज्यो नि-क्षय शिविर मांय करीब सवा दो सौ जणा री स्वास्थ्य जांच करी ज्यी। आं मांय ऊं 39 जणां मांय टी.बी. री शंका ने ध्यान राखता थकां वां ने आगे री जांच सारु सुनेल रा सामुदायिक स्वास्थ्य केन्द्र भेजी ज्यो। जिला क्षय रोग अधिकारी डॉ. मुकेश बंसल बतायो के शिविर मांय लोगां मांय टी.बी. री बीमारी रा प्रति जाग जगायी ज्यी। वे बतायो के नि-क्षय मित्र योजना रा तैत दो सौ मरीजां ने पोषण सहायता ई दीरीजी।

000

ब्रज हलका रा भरतपुर मांय आं दिनां फागोत्सव री धूम है। म्हाणा खबरनवीस बतायो के होळी ऊं पैली लोक संस्कृति रा आं उत्सवां रा तैत गळी-मोहल्लां मांय फाग रा गीतां री गूंज अर चंग री थाप सुणायी देवण लागी है।

000

चूरु महोत्सव ई आज विरासत कार्निवल यात्रा सागे सरु व्हयो। ई दौरान मोटी तादाद मांय लोग लोकगीतां अर चंग अर ढफ री थाप माथे नाच्या।